


ALAHADY - KAREMY 5 - TAONA A



I KRISTY NO FIAINANA SY FANANGANANA HO VELONA

Ry Kristianina havana, izao Alahady fahadimy amin'ny karemy izao no iarahantsika eran'ny Eglizy iraka tsirairay ato amin'ny diosezy hiaraka hiakatra hanao ny pelirinajy. Eny amin'ny “montagne de français” ho antsika eto andrenivohitry ny diosezy, hiaraka hiakatra any an-tendrombohitra isika, hiaraka handinika ny làlan'ny hazo fijaliana, hiaraka hivavaka mba hihavao tokoa ka hahafahantsika hiaraka hitsangana amin'i Kristy raha miara-maty aminy amin'ny fahotana izany hoe hampiakatra ny fiainantsika mba tsy hirefarefa amin'ny tany. Nanaiky ho fahotana i Jesoa na dia tsy mpanota aza mba hanavotra atsika ao anatin'ny fahotana ka hahazoantsika fianam-baovao ao aminy, izy tokoa miara-belona amintsika. Ny ezaka ataontsika miakatra an-tendrombohitra dia tandindon'ny

Vakiteny I : EZ 37, 12-14

Tononkira : Sal. 129,

Vakiteny II : Rom. 8, 8-11

Evanjely : Jo 11, 1 -45

famantarana ny ezaka ataontsika rehetra manambara fa eo anivontsika tokoa i Jesoa na dia mafy sy sarotra aza ny fiainana, na dia eo aza ny ADY entin'ny ratsy amintsika, na dia sarotra aza ny DIA izay tanjona ho antsika.

Izany no ambaran'ny vakiteny telo vakintsika amin'izao Alahady fahadimy ny karemy izao : raha ao amin'i Kristy

tokoa isika dia velona ary hanana ny fiainana tokoa, izany no ambaran'ny fitsanganan'i Lazara. Ny bokin'i Ezekiela mpaminany dia mitantara ny tantaram-piainantsika tokoa : raha lavitra an'Andriamanitra isika tahaka ny vahoakan'Israely mandao an'Andriamanitra tsy miara-belona aminy, fantantsika ny vokany dia ady tsy misy aina, fa raha miara-belona sy miara-dia amin'i Jesoa isika vahoakan'Andriamanitra, izy no Andriamanintsika, izy no fiainana, izy no fahamarinana, izy no fitiavana ho antsika dia velona isika ka ny Fanahiny no mamelona antsika sy mitantana ny fiainantsika, amin'izay ny ataontsika rehetra dia manambara fa zanak'Andriamanitra isika.

Hasoavan'Andriamanitra isika noho izany ka hifanasoa sy hifanao tsara ka tsy manjaka intsony ny herisetra, ny fitapitaka sy ny lainga fa ny rariny sy ny hitsiny satria olona marina isika, ny fanahin'Andriamanitra no manentana atsika.

Ny Evanjely mitantara ny fananganan'i Jesoa an'i Lazara dia fantantsika tsara fa nisy ady hevitra na tamin'ny mpianatra na tamin'i Maria sy Marta na tamin'ny Jody, isika ihany koa amin'izao famakivakiansika ny fiainantsika, amin'izao fiakarantsika manao pelerinajy an-tendrombohintra izao, amin'izao fialantsika ny fiainana izay mandrendrika atsika izay mampirefarefa atsika ka tsy hahitantsika ny anjara masoandrantsika dia tahaka an'i Maria sy Marta koa isika, tahaka an'ireo Jody sy ireo mpianatra koa izay niady hevitra. Hoy indrindra i Marta tamin'i Jesoa raha taty ianao Tompo dia tsy maty ny anadahiko ary izao dia fantako fa na inona na inona angatahinao amin'Andriamanitra dia homen'Andriamanitra anao izany.

Isika koa amin'izao famaramparanana ny karemy izao sy amin'izao pelirinajy ataontsika izao, maro ny zavatra mamono ny fiainantsika ka toa mahatsiaro isika fa lavitra Andriamanitra ary manontany aza isika tahaka nataon'i Marta manontany an'i Jesoa isika : aiza ianao Jesoa, aiza ianao tsy hita, maninona ianao no tsy hita, maninona izao ny fiainana izao ?

Fantaro fa milaza amintsika i Jesoa tahaka ny nataony tamin'i Marta koa : hitsangana ny anadihanao. Mitaky finoana amintsika Andriamanitra izany hoe mitaky fitokisana aminy, izy no afaka mamelona antsika araka ny voalaza amin'ny vakiteny voalohany. Raha avelantsika eo anivontsika tokoa izy ka, eo anivon'ny fiainantsika andavanandro dia afaka manangana atsika izy na dia eo aza ny zavatra mety mampatahotra. Na ireo manodidina atsika tahaka nataon'ireo apostoly saika nanakivy an'i Jesoa tsy handeha any amin'ny fasan'i Lazara, anisan'izany koa ilay vavaka nataon'ny mpianatra raha nilaza tamin'i Jesoa ireo olona nampandre azy : Tompo ô marary ilay tianao. Izany hoe ilay mifandray sy miara-miaina amin'i Jesoa. Namaly izy ka nanao hoe : aretina tsy ho fahafatesana ity fa ho voninahitr'Andriamanitra. Raha tonga tany amin'ny toerana i Jesoa dia nisento tokoa satria manana fifandraisana lalina tamin'i Lazara izy. Manana fifandraisana lalina amintsika tsirairay i Jesoa ka manangana atsika izy. Rehefa teo anatrehan'ny fasana izy, efa nalevina i Lazara izay manambara ilay fiainana lo ary io fianana lo io dia nanjary fianana vaovao. Izany no antenaintsika amin'izao pelerinajy ataontsika amin'ny Alahady fahadimy ny karemy izao, hiditra ao Jerosalema miaraka amin'i Jesoa isika ka ilay fiainana lo dia irintsika ho fianana vaovao.

Izao no andro tsara, izao no androm-pahasoavana, manàtona an'i Tompo àry isika. Ny tena mahavariana dia izy no manatona atsika, tahaka ny nanatonany an'ilay vehivay samaritana. Amin'izao faramparany karemy izao dia ny Evanjelin'i Md Joany no vakintsika, ireo famantarana sy fanoharana no ambaran'i Jesoa. Izy no manatona atsika ka anjarantsika no mandray azy.

Ny ezaka ataontsika izao dia midika ny fanatonantsika azy, hiakatra isika amin'izay entintsika hiakatra tokoa ny fiainantsika, hiala amin'ny fianana lo izay mahatonga ny fahafatesana ka mba hiaraka hitsangana amin'i Jesoa indray isika. Izany no ambaran'i Md Paoly ao amin'ny vakiteny faharoa : “sitrak'Andriamantira tokoa no ananantsika ny fahavelomana ao aminy”, manome ny fanahiny Andriamanitra ilay fanahy izay nanangana an'i Jesoa ho velona no manangana atsika ihany koa raha mivelona ao aminy isika. Raha ao anatintsika i Kristy na dia maty aza ny vatana noho ny fahotana dia mivelona kosa ny fanahy noho ny fahamarinana, ka ny fiombonantsika amin'i Kristy na dia tsy maintsy ho maty ny vatana dia fiainanmbaovao ao amin'i Kristy no antenaintsika.

Aoka ary hosokafintsika ny saintsika, ny fontsika amin'izao fiomanantsika akaiky dia akaiky amin'ny Paka izao, raha midina isika nahavita ny pelerinajy avy any “la montagne” fa indrindra isika eto

Antsiranana dia midina amin'ny fiainantsika andavanandro, aoka mba ho fianana vaovao, ilay fiainana maimbo noho ny haratsiana maro isankarazany noho ny fahafatesana sy ny fahotana.

Raha hanangana an'i Lazara i Jesoa dia maimbo ny fatin'i Lazara dia niova ho fiainam-baovao, izay manambara koa ny fitsanganantsika ao amin'i Jesoa. Tsy hoe tsy maty intsony tahaka an'i Jesoa i Lazara natsangana, ho faty i Lazara fa famantarana fa raha ao amin'i Jesoa tokoa isika, raha mino azy isika na dia maty aza dia ho velona tokoa ao amin'i Jesoa araka ny voalazany hoe : “raha mino aho ianareo na dia maty aza dia ho velona indray”.

Raha mino an'i Jesoa isika, rehefa midina avy any amin'ny montagne, na dia eo aza ny fiainana sarotra manambara ny fiainana lo noho ny fahotantsika, raha mibebaka tokoa isika dia hatsangan'Andriamanitra isika hijoro manambara ny fiainam-baovao ao aminy izay antenaintsika rahateo.

Enga anie ianao tokoa ry Jesoa no hanentana ny fiainanay ka ny fanahinao tahaka nataonao tamin'ireo famantarana ao amin'ny bokin'i Ezekiel, omenao anay ny fanahinao dia ho velona izahay ary ianao no Andriamanitray ary izahay vahoakanao ka na dia maty amin'ny fahotana aza izahay dia hatsanganao ho velona ho zanak'Andriamanitra ao aminao. Enga anie izao fiomananay akaiky dia akaiky amin'ny Paka izao dia i Jesoa hanampy anay bebe kokoa amin'ny ezaka rehetra ilainay amin'ny fiainanay tsizarizary, amin'ny fiainana mitondra anay amin'ny herisetra ka mahatonga anay mifanapotika sy mifamono. Mba ho fianam-baovao ao aminao anie izahay.

Ry Jesoa Kristy Tompo ô, ianao tokoa no fiainanay sy fananganana ho anay, tahaka ny nanangananao an'i Lazara dia mba hatsangano koa izahay hiala amin'ny fahafatesan'ny fahotana ka hifanasoa sy hifanatsara, ny fanahinao masina anie hamelona anay ao aminao, ka hijoroanay amin'ny fiainana tsy mety maty intsony. Amen

Mompera Arseveka Mgr Benjamin Ramaroson